



MEDICO FELICI AC DOCTO
COLLEGÆ AMANTISSIMO
BARTHOLOMÆO-TUSSANO
LE CLERC,
DOCTORI MEDICO PARISIENSI.

Solis in arte peritis Medicorum opera, nuncupari debere
semper sum arbitratus : cæteri namque homines nil
omninò in arte nostrâ sapiunt: hanc itaque, Collega
amantissime, qualemcumque Theſim nomini tuo sacram
volui, non tantùm ut amicitia publicum tibi darem
testimonium; sed & potissimùm ut mihi, inter autores
forsitan soli, id contingat gaudii, quòd certus sim ea,
quæ tibi offero scripta, ab eo, cui offeruntur, intel-
lecta fore.

ANTONIUS PETIT, D. M. P.



QUÆSTIO MEDICA,

QUOD LIBETARIIS DISPUTATIONIBUS
manè discutienda in Scholis Medicorum, die Jovis vigesima quartâ
mensis Januarii, Anno Domini M. DCC. LX.

PRÆSIDE,

M. ANTONIO PETIT,

Doctore Medico, Theses Autore.

*An in curandis affectibus, qui puerperarum suppressis prioribus Lochiis superveniunt;
sola Antiphlogistica?*

I.



NATURA masculorum benignam matrem, favam verò
seminarum novercam, non immeritò dictam olim fuisse accepi-
mus: his etenim ingenii vim corporisque robur largiri non tantum
amavit, sed eos etiam sedula, quantum potuit, immunes à morbis
præstare studuit; illas ità comparavit è contrario ut imbecillum
debili in corpore animum gereret, atque easdem innumeris ferè
voluit morbis obnoxias; mittas enim varia, quæ sobolescent mala à men-
struis purgationibus præve se habentibus, quot & quanta gravidarum, partu-
rientium aut puerperarum capiti imminet accidentia! Compertum observa-
tionibus volunt tertiam ferè mulierum partem horum sævitia de medio tolli;
verum nulla, ut frequentiora, sic & atrociora sunt illis quæ priorum lochiorum
suppressioni natales debent.

Quæ post partum per muliebria sunt evacuationes, illæ Lochia audiunt; &
duplicis præsertim sunt generis: aliæ enim statim à partu fluere incipiunt &
rubræ sive sanguinæ appellari solent, quod reipsa earum materies nil aliud
sit præter ipsummet sanguinem modò pauciori, modò copiosiori lymphâ dilu-
tum; aliæ dicuntur albæ ratione coloris quem referunt, aut secundariæ ex eo

4

quod prioribus succedant. Ad perfectam autem uteri restitutionem etsi conferrant amba; majoris tamen momenti priores esse posterioribus merito dixeris: his carere absque imminente vitæ periculo nulli puerperarum licet; plures verò videas non ita raro quibus posteriorum usurâ frui non conceditur, quæ tamen vitam imò & sanitatem servant incolumem.

Cùm semel ab uteri parte intimâ soluta fuit placenta atque foràs pulsæ sunt secundinæ, maxima vis sanguinis puri atque facili concrescentis erumpit; hanc fundunt hiantia vasculorum ostia, quorum cum placenta valis antea inosculatorum ope utriusque partis murum instituebatur commercium; sensim autem sine sensu manantis copia cruoris minuitur, atque ille solutus magis apparet, ac tandem lymphæ rarioribus onustæ purpureis particulis atque ideo dilutè admodum rubescenti locum facit: cujus mutationis in causâ est prompta & expedita post infantis & secundinarum expulsionem uteri contractio, quâ tubulorum stringuntur oscula sitque ut rubris, crassioribus nempe moleculis denegetur aditus, liber concedatur lymphaticis, quas subtiliores esse in confesso est apud omnes: prout verò plus minusvè temporis in suâ contractione absolvendâ infumunt uterinæ fibræ, prima citius cessant Lochia, longiusvè protrahuntur: hinc in quibusdam accidit puerperis ut elapsis post partum non ita multis horis terminum accipiant illa, quæ in aliis ad tertium usque diem & ultrâ producuntur; igitur versùs tertii hujusce diei finem nova solet oriri rerum series, eaque supervenit febris, quæ à lacte in motum actò nomen sibi fecit: dum autem illa viget multoque lacte cum doloris sensu non exiguo tument mammae, cessat ut plurimum omnis per genitalia humorum effluxus, raro in illis rediturus fœminis, quæ dulcissimo naturæ obsequentes imperio, piam venerabundæ nutriendo infanti operam navare non dubitant; sed qui fermè semper tritum relegit iter, ac de novo muliebris inundat in istis, quibus æs triplex circa pectus, & quæ bonorum indignatione dignæ, vile, pro pudor! & indecorum sibi fingunt, quem sinu exceperunt suo atque per novem menses foverunt, hunc in lucem emissum proprio lacte nutrire; quod barbaræ gentes excogitare erubescerent, quod ipsæmet exhorrescerent feræ, hoc sibi vitio verti posse non autumat quidem mulier ad bonos humanioresque mores aliundè composita; verùm serius oculivè pœnas ab illâ repetere satagit natura atque mille morbis suam ulciscitur injuriam, à quibus immunes victuras nutrices esse statuit. Re quidem verâ duobus à partu primis diebus fors cunctas manet eadem: sanguineam etenim omnes experiuntur evacuationem, & illa casu multiplici potest in omnibus supprimi, quod ut accidit semel, morbi nascuntur atrocissimi, quorum ad curationem tritum maxime nocere Aristolochicorum usum, solamque methodum antiphlogisticam esse adhibendam ultrò confitebitur ille, qui morbos omnes ab his prioribus suppressis lochiis oriundos, verè inflammatorios esse cognoscet.

I I.

VARIA porro accidentia, quibus præbet natales priorum lochiorum suppressio, inflammationis adeo naturam redolent, ejusque speciem ita dilucidè exprimunt, ut mirari subeat Medicos plerosque hanc prætermisissè totosque in eo fuisse ut intempestivo calidiorum usu desideratam revocarent evacuationem; nullus etenim, nisi in rebus medicis planè hospes, nescit excrementitios humores suis in conceptaculis præter naturam retentos inflammationem nunquam non concitare: sic mammarum ductibus hærente lacte, tument extrâ modum illæ, rubent, acuto dolore afficiuntur, ac nonnunquam in suppurationem abeunt: sic Hepatitidem sæpè sæpius producit impedita quavis de causâ bilis excretio: sic Nephritidi solenne est originem ducere ab urinâ in secretorii renum canalibus impeditâ. Quid plura? Nisi prohiberet instituti operis rationem innumeris comprobare exemplis facillimum foret. Nunc verò si cætero:

rum humorum congestio inflammationem sæpè sæpius excitare valet; quid; cedò, ex ipsiusmet excernendi sanguinis coacervatione eveniet? Nonne, cùm à recto defleſcit tramite, huic creando morbo aptus magis natus est sanguis quàm alii corporis nostri liquores? Nonne in praxi quotidie observare datur menstruas mulierum purgationes, si subito cohibeantur, phlogosim in uterum inducere. At quod innuere tantum valent allegata rationum momenta, illud idem suadet causarum morbi dilucidatio; illæ namque omnes suam exerunt actionem vel spasmus fibris conciliando, vel humores densando haudque meabiles efficiendo vel tandem utrumque simul producendo: porro talia præstare inflammationi ansam præbere est. Has autem inter causas primas tenent vehementia animi pathemata, ut subitaneus terror, dolorve acutus, aut exultans præter modum lætitia, aliæ id genus, quibus singulis patet spirituum inordinatos excitari motus, universum gravi succussione agi nervorum systema & cunctis proinde fibris nimiam induci tensionem, erethismum conciliari, hinc ergò fieri ut toto in corpore vasa spasmodicè constringantur, excernendis humoribus ponantur obices, atque ideo suo in tramite retardentur illi, demum sistantur omninò, congerantur, tubulorum tunicas distendant, tumorem efforment, dolorem accersant, calorem concitent, verbo inflammationem producant. Eadem efficit etiam calor immodicus quocumque modo excitetur in corpore; atque eò citiùs certiùsque hunc edit ille effectum, quod dum in fibrillas agit, eisque morbosam impergitur tensionem, humores simul densat ac proinde congestioni aptiores reddit; quatenus scilicet subtiliores eorum, à quibus pendet fluiditas, consumit & dissipat particulas. Modo non multum absimili vim exercent suam adstringentia cum, (ut suis post partum ventri mammisq; servetur honos) incautè applicantur extùs, imprudentiusve intùs suscipiuntur: non equidem avolare faciunt tenuem, quâ sanguis solvitur, lympham, sed hanc vi propriâ reddunt spissiore eique consequenter moras nectunt. Denique quantum in sistendis mulierum menstruis purgationibus valet frigus, tantum illud in suppressendis lochiis posse quotidiana evincit experientia; at quid inflammationibus suscitandis frigore potentius sic & expeditum magis? His forsitan non abs re videbitur addere; nos nonnunquam prima observavisse suppressa Lochia propter nimiam uteri compressionem, fortius nempe, post exclusum foetum, perperam institutâ deligatione abdomine constricto; quisnam autem in viscere multo sanguine turgido sit hujus compressionis effectus nemo non videt. Itaque perspectis præcipuis lochiorum suppressorum causis, liquidò, ni fallor, constat eas omnes gignendæ inflammationi idoneas esse quam maximè. Nec est quod objicias post partum aliâ adhuc de causâ uteri evacuationes non numquam sisti, nimîa scilicet alio in loco factâ excretionem, ut immoderato, v. g. alvi fluxu. At velim animadvertas rarò admodum causam hanc in prioribus sistendis lochiis, frequenter verò in secundariis suppressendis locum obtinere. Perpendendum insuper, sensum sine sensu, non autem brevi temporis intervallo & quasi subito illam agere; quo fit ut plerumque lochiorum vices gerat superveniens excretio. Sicque nullus nascitur morbus, aut si quis datur, non ille in cohibito uterino fluxu, sed in excretionem de novo accidente ponitur.

I I I.

ETSI ad dignoscendum tutòque determinandum morbi genium ea sufficere posse videantur, quæ nos huc usque docuit causarum ejusdem sedula exploratio, nè tamen ullus deinceps dubitandi subeat locus, illa confirmare juvat attentâ accidentium, quibus morbus stipatur, contemplatione; itaque cùm puerperam invadit ille, id est, cùm fluere prima desinunt Lochia, subitaneus ingruit horror, quem febris excipit acutissima, sævitiem exercitura suam donec pristinus redintegretur per muliebria cruoris effluxus; alterave arte aut

naturâ cieatur evacuatio, quæ istum supplere valeat: dùm autem febris istius igne ægotans excandescit mulier, lumborum capitique immani excruciatu dolore, dirâ torquetur siti, ac ingenti jactatur anxietate: huic sicca in cute deurens deprehenditur calor: huic scintillantes vividius micant oculi: huic atrè rubent genæ: interè si pulsus explores, hunc justo frequentiore, durumque maximè invenies; his porrò rerum in angustis, præsentem nisi citò afferat opem ars salutaris; horrendis cum torminibus ventrem videas in gravissimum tumorem attolli, adeoque distenditur ille sapius, ut nec medentis explorantem manum perferre, neque aliquandò stragulorum pondus sustinere queat sine vehementi doloris exacerbatione; pauca eaque cruda tunc temporis stillat urina, aut excernitur nulla; diaphragmatis actionem cum lædat tumefactus venter, inde fit ut parva, difficilisque sit respiratio: his tandem, procedente morbo, comites se præbent delirium, convulsio, cordis palpitatio, uteri suffocatio, & syncope, quibus mors prænuntiatur proxima; at quorsum hæc? Ut scilicet agnoscas quæ in medium adduximus, ea propria ac genuina vividæ inflammationis esse symptomata, illam præsentem arguere, atque rectè adeo exprimere, ut nulla dentur alia, quibus morbum hunc medicis dignoscere liceat; sic enim nascitur inflammationum genus omne, eo incedit gressu, nec tandem aliter terminum accipit, quàm cessat & desinit succedens Lochiis suppressis abdominalis tumor; enimverò inflammationi finem imponit vel resolutio, vel suppuratio, vel gangræna; triplici quoque hoc modo laudatum morbum nunquam non terminari ab omni ævo observarunt Præctici: nostro autem in casu, sicut in cæteris affectibus inflammatoriis, naturam primâ laudabiliorique viâ se à malo liberaturam spondet febris aliorumque symptomatum successiva remissio; imminem verò præsagium suppurationem, post breves dolosæque inducias, febris nec non doloris recrudescencia, cum vago atque fugaci horrore, &c. Gangrænâ tandem serpere monent pulsus intermittens exilitas, fœtor oris, cadaverosa facies, liporhymia frequens, quorum præcessit adventum subitanea ac sine causa facta accidentium præcipueque doloris cessatio. Tôt tantæque te movent rationum momenta assensumque rapiunt: quaris tamen nùm memoratis contrarium quid indicent secta demortuarum cadavera? Minimè gentium. Plurima cultro anatomico subjicere contigit, in plerisque uterum vidimus subatro colore tinctum, tumidum ac partim gangrænodeum, partim gravi inflammatione affectum; nec melius se habebant vicinæ partes: his ut habitus exterior idem, sic & similis affectio: in quibusdam, sed numero paucissimis, collectam circa uterum, infusâ in pelvi, aliqualem purulenti ichoris copiam deprehendimus, visceribus ut suprâ phlogosi laborantibus: vitam denique primis à partu diebus idè cum morte commutare mulieres, quod ventris interiora corripit gangræna, evincit toties ab ipsâ plebe notata corporum citissima corruptio, horrendaque putrefactio, quibus illa terræ ociùs mandare cogimur,

I V.

SI quid in arte nostrâ tanquam verum & inconcussum spectari potest, illud certè quod huc usque prosecuti sumus, morbos nempe à cohibitis prioribus Lochiis oriundos verè inflammatorios esse; unde colligendum necessariò venit sola in his curandis usurpanda esse Antiphlogistica. Nec enim ad sanandas inflammationes cæteras ab humorum excernendorum retentione ortas alia in usum vocant melioris notæ Præctici; & certè culpandus ille foret qui Nephritidis, exempli causâ, curationeni propinatis calidioribus Diureticis auspicaretur: ille namque scopum attingeret minimè: istis inflammationem adauget atque novos urinæ expulsionis poneret obices, nedum præsentis tolleret; & idè sanguinis missionibus repetitis, potu, balneis, laxantibus atque demulcentibus omnigenis hanc debellare omni ope atque operâ satagunt; apprimè quari optimum

certissimumque in inflammationis remissione positum esse Diureticum; in eâdem quoque nostro in casu constitutum est unicum tutissimumque medicamen Aristolochicum: itaque tota in eo incumbat medentis cura ut vasis inductam tollat crispaturam, erethismum sedet, quibus peractis brevi per laxata uterinorum vasculorum ostia sponte manabit cruor, conveniens redintegritur excretio, aut saltem morbus, à quo maximè imminet periculi, terminabitur; age ergò, largâque manu sanguinem mittere ne dubites: id enim exinde non tantum percipies emolumenti, quod enarrata præstare continget, sed quod etiam redundantem, propter sublatam evacuationem, sanguinis copiam ac strages undique minantem, hæc ratione subducere valebis: potus sit interea copiosus, tenuis, atque demulcens; frequentia eaque minimè acria injiciantur enemata; emollientibus foveatur infimus venter, foveantur & genitalia... At gravem de sanguinis missione potius è saphenâ quam è brachio celebrandâ, moveri aiunt controversiam, quam quidem paucissimis dirimendam suscipimus: enimverò primis morbi temporibus sanguinem præstat è brachio fundere, atque ad phlebotomiam in inferioribus institutam tunc solummodo confugere licet, cum in brachio secta jam pluries fuerit vena: nam cum in abdomine defavit inflammatio, sanguinem ad inferiora derivare perindè foret ac irruenti morbo calcar admoveere. Numquid igitur antiphlogisticis ita per totum morbi decursum insistendum, ut ulla alterius generis locum obtinere nequeant medicamina? Absit ut ex dictis tale quid cenleas deducendum; cum etenim fracta semel fuerit morbi violentia, fuerint etiam depleta ut decet, atque laxata vasa, tunc tardigrado sanguini morasque in utero neccenti ut momentum adjiciatur, quo excitatus ille circuitum possit renovare, nil vetat, inò suadent ratio & faustus frequensque rerum usus: quin & felicissimo cum successu temperatum tunc temporis propinare emeticum non unâ vice mihi contigit.

V.

PONDERATIS ergò mox in medium prolatis rationum momentis, jam cognoscere potest unusquisque quàm graviter hallucinentur illi, qui posthabitis, quæ laudavimus, auxiliis, omne se tulisse punctum in tractandis suprâ enarratis affectibus sibi fingunt, cum plenâ manu elixiria, tincturas totamque Emmenagogorum farraginem propinarunt. O præjudicatis opinionibus obcæcati homines! Qui non vident hanc, quam revocare student evacuationem talibus magis impediri fortiusque cohiberi; quandoquidem istis vires inflammationi adduntur; enimverò remedium, rectius dicam, venenorum istorum vi fibrarum aded spasmus intenditur, ut ulterioris distractionis impotentes illæ omnino tandem rumpantur, hincque eveniat ut impete facto extrâ vasa prorumpant liquores, per cellularem contextum confusè rapiantur ac disseminentur, hæc loci coeant, brevi alterationem patiantur, putrescant; vicina contagio afficiant, gangrænâ tandem mortemque accersant; dicam enim quod res est; àb hæc præposterè adhibita methodo repetenda potissimum veniunt numerosa aded puerperarum funera: certè, ut in aliis benè multis casibus, sic in istis satius multò foret integram rem naturæ committere, quàm inconcinnâ agendi ratione illam à scopo divertere; plurimas namque salvas incolumesque præstaret fœminas naturæ solius vis & actio, dum ad orci fauces trudit contrâ serè omnes malè institutus minimeque temperatus Pharmacorum usus. Non dissidendum tamen inausum aded exitum non ita sæpè morbos, de quibus egimus, experturos, si soli ad opem ægrotantibus puerperis ferendam advocarentur Medici: illi namque artis dogmatum probè gnari, & genuinam morbi naturam assequi & ejus ferocitatem idoneis debellare remediis apprimè callent: nec optimos inter Collegas desunt, qui felicissimâ praxi eam stabiliunt medendi normam, quam legitimam inveniunt

probavimus argumentis: verum nostrâ potissimum in Galliâ, ubi ad ostentationem & pompam potius quàm ad usum civiumque obligationem sapientiores, quæ præsertim Medicinam spectant, leges conditas dices, ignavâ obstetricantium turbâ ab ægrotantium puerperarum cubiculis vel omnino arcentur Medici, vel postquàm in administrandis inanibus remediis, venenisve propinandis tempus trivit muliercularum garrula gens, auxiliatricem ut illi moribundis operam conferant accerfuntur roganturque; non enim pharmaca quævis dare soli audent Chirurgi, Pharmacopolæ, Monachi, &c. Sed & obstetrices ipsæmet, quamvis litterulas à pueritiâ vix didicerint, nihilominus tamen gravidarum, parturientium atque puerperarum morbos curare, sui esse juris autmant & tractandos reipsâ sibi assument per mortes experimenta facturæ; tantis medela malis non ab aliis fortè quàm ab ipsismet medicis spectanda venit; ita enim sunt homines comparati, ut apud illos nullus extiterit rerum abusus vel enormis quam maximè, qui cum longâ consecratus fuerit annorum serie, rationi apprime consentire non videatur ac pro legitimâ agendi normâ tandem non habeatur: rem igitur restituerent nostrates Medici, si sibi proponerent imitandos Angliæ & Bataviæ Doctores, qui Ruischii, Deventeri, Douglassii vestigia prementes, exercendæ obstetriciæ arti operam navare non erubescunt; quò plures etenim inter se diversi in arte quilibet existunt ministri, eò deterius artem exerceri certissimum est. Imperatorum ducumque servi, pedissequi, commeatuum ductores, opifices, impedimentâ exercitûs olim dicti fuere: ego verò obstetrices, herbarios, &c. Medicorum impedimenta dico, quibus ut illi, si sapiunt, cum bonis reipublicæ rebus, sese tandem liberent futurum spero & ex prælibatis concludo.

Ergo in curandis affectibus, qui puerperarum suppressis prioribus Lochiis superveniunt, sola Anaphlogistica.

DOMINI DOCTORES DISPUTATURI.

M. Bernardus-Nicolaus Bertrand, Chirurgiæ Professor designatus.

M. Stephanus - Ludovicus Geoffroy.

M. Dionysius Pautier de la Breuille.

M. Natalis Andreas Joannes-Baptista Chesneau.

M. Joannes-Franciscus Paris.

M. Dionysius-Claudius Doucet.

M. Joannes le Thieullier.

M. Jacobus Verdelhan des Moles, Serenissimi Principis Condæ Conflariarum & Medicus.

M. Ludovicus - Renatus Desbois.

Proponerebat Parisiis JOSEPHUS DUSSANS, Atyrensis, Saluberrimæ Facultatis Medicinæ Parisiensis Baccalaureus, A. R. S. H. 1760.

A SEXTA AD MERIDIEM,